Primary 5

There was a rammie in the street, A stishie and stramash. The crabbit wifie up the stair Pit up her winda sash.

"Nou what's adae?" the wifie cried,
"Juist tell me what's adae."
A day is twinty-fower hours, missis,
Nou gie us peace to play.

"Juist tell me what's ado," she cried,
"And nane o yer gab," cried she.
D'ye no ken a doo's a pigeon, missis?
Nou haud your wheesht a wee.

"I want to ken what's up," she cried, "And nae mair o yer cheek, ye loun." It's only yer winda that's up, missis. For guidsake pit it doun.

The Corbie

A Corbie sits at the tap o' thon tree,
An he's luikin doon with his black, black ee,
An he's crying oot wi a Caa! Caa! Caa!
'If ye try yae sclim up
Ye're suir tae faa!'

Ma feyther says it'll no be lang Afore A'm big an souple an strang; Then A'll sclim up an A'll no faa, An ye'll see if the Corbie Cries Caa! Caa! Caa!

For A ken his nest's at the tap o' thon tree, That's why he's sittin cryin at me. Ma mither says it's a daft like ploy, But ma feyther cuid dae it When he wis a Boy!

A Dug, A Dug

Hey, daddy, wid yi get us a dug?

A big broon alsatian? Ur a wee white pug,
Ur a skinny wee terrier ur a big fat bull.

Aw, daddy. Get us a dug. Wull ye?

N whose dug'll it be when it durties the flerr? and pees'n the carpet, and messes the sterr? It's me ur yur mammy'll be taen fur a mug. Away oot an play. Yur no needin a dug.

Bit, daddy! Thur gien thum away doon therr at the RSPCA.
Yu'll get wan fur nothing so ye wull.
Aw, daddy. Get us a dug. Wull ye?

Doon therr at the RSPCA!

Dae ye hink ah've goat nothing else tae dae bit get you a dug that ah'll huftae mind?

Yur no needin a dug. Ye urny blind!

Bit, daddy, thur rerr fur guardin the hoose an thur better'n cats fur catchin a moose, an wee Danny's dug gies is barra a pull. Aw, hey daddy. Get us a dug. Wull ye?

Dae ye hear im? Oan aboot dugs again? Ah hink that yin's goat dugsn the brain. Ah know whit ye'll get; a skiten the lug if ah hear any merr aboot this bliddy dug.

Bit, daddy, it widnae be dear tae keep N ah'd make it a basket fur it tae sleep N ah'd take it fur runs away orr the hull. Aw, daddy. Get us a dug. Wull ye?

Ah don't hink thur's ever been emdy like you. Ye could wheedle the twist oot a flaming coarkscrew. Noo get doon aff mah neck. Ah don't want a hug. Awright. That's anuff. Ah'll get ye a dug.

Aw, daddy! A dug! A dug!

Bill Keys